

凡大小數十百戰識邊事數上書言宜結和親又陳委輸可從溫水漕以省陸轉輸之勞事皆施行後南部烏桓降服北邊無事霸在上谷二十餘歲三十年定封淮陵侯永平二年以病免後數月卒

耿舒况子弇弟更始徵代郡太守趙永况勸永不應召令詣光武光武遣永復郡而代令張曜據城拒永招迎北部烏桓以爲援助光武以舒爲復胡將軍使擊曜破之後封牟平侯卒

蘇竟字伯况扶風平陵人平帝世以明易爲博士講書祭酒善圖緯能通百家之言王莽時拜代郡中尉時北邊擾亂民多罹禍竟終完輯一郡光武卽位就拜代郡太守使固塞以拒邊寇建武五年冬盧芳略得諸郡帝使偏將軍隨